

18. oktober 2018

UKA 2018/104

Kalaallit Nunaanni pinerluttulerinerimi Inatsimmi § 20 imm. 2-p allanngortinnissaa pillugu danskit naalakkersuisuinut attaveqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaasilluni unioqquitsinerit imaluunniit inatsimmi § 99 naapertorlugu unioqquitsinerit ilungersunartut immikkut taasat pisortanit unnerluutiginnittussaatitaasunit eqqartuussinermut utaqqisitassamut atatillugu unnerluutiginnissutissanngortillugit.

(Inatsisartunut ilaasortaq, Steen Lynge, Demokraatit)

Siumup pingaartilluinnarpaa inuaat inatsisitigut illersugaanerisa qulakkeersimajuarnissaa. Taamaattumik Siumup eqqartuussiveqarnerup pitsangorsarneqartuarnissaanut pinerluttuleriner-mullu inatsiseqarnerup pitsasuujuuaannarnissaanut sulinermut peqataassaaq peqataajuassallunilu. Siunnersuuteqartoq isumaqtigaarput inuk kinaluunniit nikanarsarneqarnermigut inuunermi sinnerani ajoquserneqarsinnaammatt, allaat siunissaq taartuinnangorsinnaalluni suliffissaqarniarneq, ilinniagaqarniarneq, aappaqarneq ilaqtariinnerluunniit aserorluinnarsinnaallutik.

Siunnersuuteqartoq isumaqtigivarputtaaq oqariartuuteqarmat inuup allap isigineqarneranik aserueriarnissaq aatsaat taamak periarfissarissaartigisoq, tassami ullutsinni ilaatigut inuit qarasaasiaq aqqutigalugu naapittarfiini nikassaataasinnaasunik saqqummiussaqarsinnaaneq imaaliallaannaq pisinnaammatt.

Taamaattumik pissutsit taamaattut inuaqatigiittut akiorniarnissaannut sulinermi sinaakkutit toqqisisimanarlutillu pitsasusuusariaqartut Siumumi isumaqarpugut. Soorlu oqareernitsituut nikanarsaalluni inoqammut iliorneq pineqartumut ajorluinnartumik kinguneqarsinnaasarpooq, taamaammallu taamaaliortoqarsimatillugu suliakkiuteqarnissamut tunngasut innuttaasunut pitsaanerusariaqartut Siumumi isumaqarpuguttaaq.

Malittarisassanik allanngortitsisoqarnissaa siunnersuuteqartup matumani anguniarpaa, taamaaliornikkut nikanarsaataasumik ajuallatsitsinernik suliat pisortanit unnerluussissutigineqarsinnaalersillugit.

Siornatigut suleriaaseq taamaasimavoq. Suliat nikanarsaanermik toqqammavillit suliakkiutigineqartartut annertoorsuartut taaneqarsinnaanngillat, aammalu inuit akunnerminni saqitsaassuteqarnermikkut ajuallatsitsisinnaaneq annerusumik minnerusumilluunniit atugarisarsimasavut eqqoriarneqarsinnaavoq, tamakkualu ilaatigut tunngavigalugit suliakkiutit ilaatigut unitsiinnarneqartarnerannik kinguneqartarluni.

Taamaattorli ullutsinni inuit naapittarfii ajornannginnerulerput, paassisutissanillu ajornannginneerarsuarmik siammerisoqarsinnaalluni. Tamakku tunngavigalugit sukannersumik malittarisassaqarnissaq piissusissamisoortutut Siumumi isumaqarpugut, taamaattumillu nikanarsaataasunik ajuallatsitsinerit pillugit politiinut suliakkiuteqaqqittalernissaq Siumumiit isumaqtigaarput, tamanna aamma pitsaliuinermut iluaqutaasinnaasutut isumaqarfingatsigu.

Taamatut oqaaseqarluta siunnersuut manna Siumumiit ilalerparput, ataatsimiititaliamullu susassaqartumut aappassaaneernissaa sioqquillugu suliarineqarnissaa innersuussutigalutigu.

Anders Olsen, Siumut.